

Bianca Bossers ganadora di Festival Cancion Mejicano Aruba Antillas

ORANJESTAD(AAN) -- Diasabra dia 28 di Mei, e festival di cancion mejicano Aruba/Antillas a tuma lugar na Curacao den Club "Asiento" na Rust 7 Bourgh.

Na e festival aki a participa e 30 mihor cantantenan di cancion mejicano di Aruba/Antillas.

E miembronan di jurado a elihí Bianca Bossers di Aruba como e ganadora maximo y e pueblo a acepta esaki.

For di su prome presentacion ya tabata vista cu Bianca tabata e candidato pa e ganadora maximo.

Ora el a subi escenario pa di dos biaha, el a worde elihí como ganadora maximo y reina di musica mejicano.

Di Aruba 5 cantante a gana un

premio, Bonaire 3 y Curacao 2. E resultado ta como lo siguiente: Bianca Bossers di Aruba como e ganadora maximo, Wimpi Dunk di Bonaire na di 2 lugar, Calixto Coffie di Bonaire na di 3 lugar, Ivy Paris di Curacao na di 4 lugar, Brenda Henriquez di Aruba na di 5 lugar, Vicente Tromp di Aruba na di 6 lugar, Luis Sanchez di Aruba na di 7 lugar, Francisco (Chico) Kock di Aruba na di 8 lugar, Elia Isenia di Curacao na di 9 lugar y Piet Melaan di Bonaire na di 10 lugar.

Como cantante mas popular a resulta Tommy de Cuba y e cantante cu mihor actuacion Wimpi Dunk di Bonaire.

E maestra di ceremonia di Aruba tabata Lulu Croes kende a haci un trabao fantastico ya cu



el a percura pa no solamente presenta pero tambe encurasha e cantantenan.

E comentarionan na Curacao tabata cu Lulu a prepara su mes hopi bon pa e anochi y cu e tabata e mihor animadora ariba escenario, aunke cu esun di Curacao y Bonaire a haci un bon trabao, pero Lulu a sobresali.

E dos mariachinan di Aruba, Mariachi Perla di Aruba y Mariachi Orguyo di Aruba a

duna un presentacion como debe ser. Tanto nan uniform como nan acompañamento tabata fantastico.

Aruba un biaha mas a demostra cu e ta mihor den tur sentido y esaki a worde acepta tambe na Curacao.

Pablo Kelly, organizador, ta felicita tur e cantantenan di Aruba y tambe e dos mariachinan y e pueblo en general, pasobra sin e apoyo aki esaki no a worde logra.